

Na osnovu člana 70. st. (1) i (3) Zakona o javnim nabavkama („Službeni glasnik BiH“, broj: 39/14), a na prijedlog Komisije za javne nabavke, imenovane Rješenjem Vlade Federacije Bosne i Hercegovine („Službene novine Federacije BiH“, broj: 25/16), Vlada Federacije Bosne i Hercegovine, na 66. sjednici, održanoj 25.08.2016. godine, donosi

**ODLUKU  
O IZBORU NAJPOVOLJNIJEG PONUĐAČA ZA NABAVKU USLUGA - ODRŽAVANJA  
MICROSOFT SOFTVERA – MICROSOFT-OVA GLAVNA PODRŠKA (MICROSOFT  
PREMIER SUPPORT) ZA POTREBE BUDŽETSKIH KORISNIKA  
FEDERACIJE BOSNE I HERCEGOVINE**

**I.**

Prihvata se preporuka Komisije za javne nabavke, imenovane Rješenjem Vlade Federacije Bosne i Hercegovine („Službene novine Federacije BiH“, broj: 25/16) da se u postupku javne nabavke usluga - održavanja Microsoft softvera – Microsoft-ova glavna podrška (Microsoft Premier Support) za potrebe budžetskih korisnika Federacije Bosne i Hercegovine, kao najpovoljniji ponuđač izabere: MICROSOFT BiH d.o.o. Sarajevo, za ponuđenu ukupnu cijenu ponude sa uračunatim popustom bez PDV-a u iznosu 449.868,96 KM.

**II.**

Ponuđač iz tačke I. ove odluke ocijenjen je kao najpovoljniji, jer ispunjava sve uslove postavljene tenderskom dokumentacijom, a ponudio je cijenu koja odgovara procijenjenoj vrijednosti nabavke ugovornog organa.

**III.**

Sa izabranim ponuđačem iz tačke I. ove odluke zaključit će se ugovor na period od tri godine.

**IV.**

Za realizaciju ove odluke zadužuje se Generalni sekretarijat Vlade Federacije Bosne i Hercegovine.

## V.

Ova odluka stupa na snagu danom donošenja i objavit će se na web stranici Vlade Federacije Bosne i Hercegovine ([www.fbihvlada.gov.ba](http://www.fbihvlada.gov.ba)), istovremeno sa upućivanjem iste ponuđaču koji je učestvovao u postupku javne nabavke, u skladu sa članom 70. stav (6) Zakona o javnim nabavkama.

### O b r a z l o Ź e n j e

Postupak nabavke pokrenut je Odlukom Vlade Federacije Bosne i Hercegovine o pokretanju postupka javne nabavke („Službene novine Federacije BiH“, broj: 24/16). Javna nabavka provedena je putem otvorenog postupka. Procijenjena vrijednost nabavke za tri godine iznosi 450.000,00 KM bez PDV-a. Obavijest o nabavci 854-1-2-27-3-3/16 poslana je na objavljivanje 20.05.2016. godine, te je istog dana objavljena na portalu Javnih nabavki. Sažetak obavještenja objavljen je u „Službenom glasniku BiH“, broj: 39/16.

Tendersku dokumentaciju preuzelo je 6 (šest) privrednih subjekata, a 1 (jedan) ponuđač dostavio je blagovremeno ponudu u predmetnom postupku nabavke. Nije bilo neblagovremenih ponuda. Ponudu je dostavio ponuđač MICROSOFT BiH d.o.o. Sarajevo.

Komisija za javne nabavke, imenovana Rješenjem Vlade Federacije Bosne i Hercegovine („Službene novine Federacije BiH“, broj: 25/16), dostavila je Vladi Federacije Bosne i Hercegovine Zapisnik o pregledu i ocjeni ponuda i Preporuku o izboru najpovoljnijeg ponuđača za MICROSOFT BiH d.o.o. Sarajevo, ID broj: 4201137660008, sa registriranim sjedištem u ul. Fra Anđela Zvizdovića 1, Sarajevo, zajedno sa Izvještajem o radu Komisije.

U postupku donošenja ove odluke, posebno su cijenjene činjenice, da je Komisija pravilno i potpuno, izvršila ocjenu kvalificiranosti ponuđača, te ocjenu prispjele ponude, shodno kriterijima iz tenderske dokumentacije.

U postupku ocjene provedenog postupka, Vlada Federacije Bosne i Hercegovine nije našla razloge, nepravilnost niti propuste u radu, koji bi eventualno bili osnov za neprihvatanje preporuke Komisije za javne nabavke.


Naime, u postupku je ocijenjeno da je Komisija u svemu pravilno postupila, te da je izbor izvršen u skladu sa Zakonom o javnim nabavkama, podzakonskim aktima i tenderskom dokumentacijom.

Uzimajući u obzir naprijed navedeno, odlučeno je kao u dispozitivu ove odluke.

### POUKA O PRAVNOM LIJEKU:

Protiv ove odluke može se izjaviti žalba ugovornom organu - Vladi Federacije Bosne i Hercegovine, u pisanoj formi direktno, elektronskim putem ili preporučenom poštanskom pošiljkom, u roku od 10 (deset) dana od dana prijema ove odluke.

V. broj: 1627/2016  
25.08.2016. godine  
Sarajevo

  
PREMIJER  
Fadil Novalić